

SANCTISSIMI IN CHRISTO PATRIS,  
ET DOMINI NOSTRI DOMINI

# BENEDICTI

DIVINA PROVIDENTIA

PAPÆ XIV.

EPISTOLA ENCYCLICA

AD PRIMATEM, ARCHIEPISCOPOS,  
ET EPISCOPOS

REGNI POLONIÆ.

*Biblioteka warszawskiej Szkoły*  
De tollendis abusibus ab Oratorijs privatis,  
quæ sunt in domibus Laicorum.

*Warszawa 1760 sub Replacata S. S. S.*



*Allegory  
Regles  
a moté Dei*

ROMÆ, MDCC LI.

Ex Typographia Reverendæ Camerae Apostolicæ.

*Logia pol. 7047.*

*4072*

INSTITUTIONE...  
DE DOMINI...  
BENEDICTI

BENEDICTI

ANNO DOMINI

MDCLXXV



EPISCOPUS

AD BRITANNIAM...  
EPISCOPUS

220235<sup>m</sup>

Handwritten text in a cursive script, possibly a signature or name.

Handwritten text in a cursive script, possibly a date or address.

Handwritten text in a cursive script.

Handwritten text in a cursive script.

Handwritten text in a cursive script.

ROBERTUS

Handwritten text at the bottom of the page.

H

V



fiv  
adl  
ut  
tur  
rat  
ner  
te  
ru  
de  
au  
po  
de  
N  
qu  
O  
ve  
N  
pr  
ca  
te  
ha  
de  
au

(3)  
**BENEDICTUS**  
**P A P A XIV.**

*Venerabiles Fratres, salutem, & Apostolicam Benedictionem.*



**M**AGNO cum animi Nostri dolore à Nobis intellectum est, nonnullas in Diocesis vestris controversias ac molesta dissidia, propter Oratoria privata, insurrexisse; quibus præcidendis cum omnis per Vos cura ac diligentia adhibita fuerit, non modò optato sine frustrati sitis, sed & in aliorum offensionem incurreritis, Vobisque eam acquisiveritis reprehensionem & notam, quasi nimio rigore adhibendo modum excedatis. Optari proinde à vobis, ut per hanc Sanctam Sedem certæ Vobis regulæ indicentur, ad quarum normam, sublatis abusibus, privati Oratorii Privilegium exerceri debeat: idque ad eum finem, ut, cum Ordinationes vestræ Pontificia Auctoritate Nostra munitæ fuerint; non solùm ab omni malevolorum censura immunes evadant, verùm majus semper eisdem honoris atque æstimationis pondus accedat. Licet autem vestræ hujuscemodi petitioni satisfacere facillimè potuissimus, illos Vobis libros indicando, tam in quibus de hujusmodi materia doctrina traditur Prædecessorum Nostrorum Romanorum Pontificum Decretis conformis, quàm alios etiam, quorum Scriptores, dum de privatis Oratoriis agunt, ea Sanctæ Sedis decreta vel dissimulant vel ignorant, quæ assertionibus eorum omnino opponuntur; Nihilominus, cum Nos, Venerabiles Personas Vestras præcipuo ac speciali affectu prosequamur; per Encyclicam hanc Epistolam Nostram, qua fieri poterit brevitate, tum eorundem Decessorum Nostrorum, tum nostram hac super re mentem sensusque aperiemus: quibus quidem, præter obedientiam, quæ eisdem debetur, ratione auctoritatis, à qua velut à fonte dimanant, aliud etiam

nescio quid majoris ponderis inest, materiæ ipsius nomine, quæ eorum obiectum est, quæque in quæstione versatur; cum omnis hujusmodi res ab Apostolicis Privilegiis dependeat, quorum explicatio privativo jure Summis Pontificibus reservata est: cumque eadem præcipuam normam desumere debeat ex intentione illius, à quo concessio facta est; cujus sensus concedenti semper, quam alii cuilibet, notior esse debet: Adeo ut quidquid à Vobis secundum ea, quæ in Encyclica hac Epistola nostra continentur, ordinabitur, & statuatur, id pro exequendis Summorum Pontificum præscriptis præstitum esse dicendum sit; cujus rei gratia Apostolicorum Delegatorum qualitatem, & auctoritatem Fraternitatibus Vestris additam esse censendum est; quam etiam, quatenus opus sit, Nos ipsarum præsentium Literarum tenore vobis ad hujusmodi effectum concedimus, & imperimur.

Nihil sanè expositum Nobis est, quod ad ea pertineat Sacella, quæ in Episcopalibus Palatiis vestris habetis, pro Missa, vel per vos, vel per alios celebranda, aliave quapiam Sacra functione, quæ officij ac dignitatis vestræ propria sit, obeunda; de quibus latè differere Nobis perfacile esset, nisi hoc à proposito Nostro alienum foret. Quare duo tantummodo vetusta Sacellorum exempla indicabimus, quæ Episcopi in proprio Episcopio à publicis Ecclesijs distincta, ac separata habebant, in quibus Sanctum Missæ Sacrificium celebrabant. Horum primum, Sacellum est Sancti Cassij Episcopi Narniensis, de quo S. Gregorius in *Homilia 37. super Evangelia* narrat, quod licet gravi morbo opprimeretur, in *Oratorio Episcopij sui Missas fecit*, tam ut propriæ, quam ut eorum, qui illum visitaturæ adveniebant, devotioni satisfaceret. Alterum exemplum est S. Joannis Eleemosynarii Episcopi Alexandrini, qui, sicut in Actis ipsius à Leontio scriptis deprehenditur, illos coarguens, qui, Missam nondum peractam discedebant, quum ipse ad eandem celebrandam in publicam Ecclesiam se conferebat, dicere in more habebat: *Ego propter Vos descendo in Sanctam Ecclesiam, nam poteram mihi met facere Missas in Episcopio.* Prædictum exemplum legere est apud Thomassium de *veteri ac nova Ecclesiæ disciplina par. 1. libr. 2. cap: 93. num. 6.*: Alia exempla in *Opere de Oratorijs privatis* inscripto cap: 6. collecta reperiuntur ( quod opus novissime

me à Joanne Baptista Gattico Canonico Lateranensi Romæ in lucem editum est) per quæ Episcoporum jus circa Sacella in propriis Episcopalibus Palatiis habenda validis fundamentis innixum comprobatur: Huic quidem juri Sacrum Tridentinum Concilium nulla ratione derogavit; quippe quod tantummodo *Sess. 22. de observandis, & evitandis in celebratione Missæ*, propter multa, quæ parum decenter fieri identidem contingebat, Episcopis præcepit, ne Secularibus, ac Regularibus Missam celebrare permitterent *privatis in Domibus*, & extra Ecclesias, aut Oratoria publica, quæ Divino cultui destinata essent; quod nullam cum Cappellis, quæ in Episcopalibus Palatiis sunt, rationem habet, quum hæc sub privatarum Domorum nomine nunquam censi possint. Id pluries à Congregatione Ven. Fratrum nostrorum S.R.E. Cardinalium ejusdem Concilii Tridentini Interpretum, in aliquot ejusdem resolutionibus, validis rationibus innixis, declaratum est, quas Nos in *Nostro de Sacrificio Missæ Tractatu* retulimus *Sect. 2. §. 45. & seq. Latine Editi Patav.*: Nos enim, tunc etiam cum in minoribus constituti, opus aliquod conscriberemus, illud præcipue Nobis gloriosum duximus, ut nulla in parte à Romanæ Curie Tribunalium Sententiis recederemus, quibus ut plurimum à Pontificiis Oraculis auctoritatis robur accedit.

Illud tantummodo de hujusmodi Episcoporum Privilegio dici poterat; quod, cum idem ad Sacella, quæ in Episcopis sita sunt, restringeretur; nullo modo Episcopis favere poterat, tum cum iidem extra proprias domos versarentur, cum Visitationem obirent, sive cum iter haberent; adeo ut, cum vel Missam celebrare, vel eidem interesse vellent, ad publicas Ecclesias se conferre cogerentur, vel à locorum Ordinariis veniam petere, ut sibi, liceret vel Missam celebrari facere, vel ipsi eandem celebrare, in illa habitatione, in qua forte diversarentur.

Verum recol. mem. Prædecessor Noster Bonifacius PP. VIII. in Decretali sua = *Quoniam Episcopi, de Privilegijs, in Sexto*, male factum reputans, Episcopos sine rationabili causa Missam quotidie non celebrare, aut eidem non interesse, eidem concessit, ut etiam extra propriam Diocesim Altari portatili, seu Viatico uterentur; *Præsenti Constitutione indulgemus ysdem, ut Altare possint habere Viaticum, & in eo celebrare, aut facere celebrari*

*brari ubicumque absque interdicti transgressione illis permittitur celebrare vel audire Divina.* Dignum animadversione verum est, *Ubicumque*, quod quidem precul dubio loca etiam, quæ extra Diocesim sita sunt, comprehendit. Præcipuam etiam animadversionem dictæ Congregationis Concilii Resolutiones merentur; cum ad Quæsitum eidem propositum, num videlicet Episcopus, qui extra propriam Diocesim est, ad utendum Privilegio Altaris Viatici, petere ejus rei veniam ab Episcopo Loculi teneatur; minime eum teneri respondit; alioqui frustratorium Bonifacij VIII. Privilegium fuisset; quoniam illius Pontificis ætate antiquum Jus in suo vigore perstabat, cui, quemadmodum mox dicetur, à Concilio Tridentino postea derogatum fuit, secundum quod Episcopi facultatem concedebant Missam in privatis Domibus celebrandi. Similiter, cum eidem Congregationi alterum Quæsitum propositum fuisset, num privilegio per Bonifacium VIII. Episcopis concessio, vel Tridentinum Concilium, vel Pontificis Pauli V. Decretum, de quo pariter mox dicetur, præjudicium ullum attulissent; nihil pariter Privilegio illi detractum fuisse respondit; cum tam in Concilio, quàm in citato Decreto, sublata quidem Episcopis facultas fuerit, qua aliis licentiam in privatis domibus Missam celebrandi concedere possent, verum nequaquam juribus illis expoliati remanserint, quæ proprias personas respiciunt, quæque eorundem dignitatis, atque characteris propria sunt. Prædictæ resolutiones à Nobis referuntur in nostro Tractatu *de Sacrificio Missæ* latinæ editionis Patavinæ *Sect. 2. §. 42.*, nec non in Commentariis bon: mem: Cardinalis Petra ad Constitutiones Apostolicas *tom. 4. super Constitutione 2. Urbani V. num. 15.*, & seq: & à Gattico in recenti ejusdem Tractatu *de Oratorijs domesticis in tit. de usu Altaris portatilis cap. 12. num. 2.*, & seq.

Tam verum est, quàm quod verissimum, nullam rem majus præjudicium privilegiis afferre, quàm abusum eorundem: quod quidem satis superque pro vero comprobatum fuit etiam in casu hujus privilegii Altaris portatilis, quod concessum Episcopis est, & quod post Concilium Tridentinum, ac Paulinum Decretum illæsum remansit. Certis indiciis compertum fuit, quosdam Episcopos eodem abuti, qui, vel intra, vel extra Diocesim, ad Laicorum se domos conferebant, atque in iis, vel ipsi Missam celebrabant, vel, ut ibidem plures celebrarentur  
Missæ,

Missæ, faciebant, idque nulla necessitate urgente, sed ad eum tantum finem, vel ut proprium Privilegium ostentarent, vel ut Laicorum petitioni satisfacerent, Cum hujusce inconvenientis notitia ad Concilii Congregationem pervenisset, non prætermisit hujusmodi excessum prohibere, ejusdemque abusus corrigendi curam Archiepiscopis committere, si quando factum in locis eorum jurisdictioni subjectis contigisset. In Codicibus Actorum, seu Regestris Congregationis prædictæ lib. 48. *Decretorum fol. 471.* resolutiones ipsæ referuntur. Quia tamen nihilominus malum invalescebat; à felicis recollectionis Prædecessore Nostro Clemente Papa XI. die 15. Decembris 1703. sequens Decretum publicatum fuit, in quo postquam inconveniens expositum fuit, nimirum — *Episcopi etiam in aliena Diœcesi extra Domum propriæ habitationis in privatis Laicorum Domibus erigi faciunt Altare, ibique per unum, aut per plures è suis Capellanis vivificam Christi Hostiam immolant, — ad remedium gradus sit: Ad abusus hujusmodi eliminandos &c. Sanctissimus Dominus Noster &c. expresse declarat, Episcopis & hismajoribus Prælatibus, etiam Cardinalatus honore fulgentibus, neque sub prætextu privilegii clausi in corpore Juris, neque alio quocumque titulo, ullo modo licere extra domum propriæ habitationis, in domibus Laicis, etiam in propria Diœcesi, quod fortius intelligitur in aliena, etiam si Diœcesani consensus adhiberetur, erigere Altare, ibique Sacrosanctum Missæ Sacrificium celebrare, siue celebrari facere.*

Magni hujus Pontificis menti ille tantummodo finis in hoc propositus fuit, ut abusus tollerentur, numquam autem ut recto privilegii usui quidquam detraheretur. Et quia relata verba prohibitiva, utpote nimis ampla, & effrænata, cuiquam præbere ansam poterant affirmandi, non licere Episcopis uti privilegio Altaris portatilis, tum cum vel Diœcesim visitant, vel iter faciunt, aut alia justa de causa extra residentiam sunt, atque in Laicorum domibus morantur; illato de hujusmodi re sermone in Congregationibus, quæ sub Innocentio XIII., immediato Clementis ejusdem Successore, habitæ fuerunt, quarum Nos tunc in minoribus existentes, à Secretis fuimus; opportunum factu judicatum est, ut ea, quam mox subjicimus, Declaratio fieret, quæ postea inferta fuit in ejusdem Innocentii Literis incipientibus — *Apostolici Ministerii* —, quas idem Pontifex pro constituendo in

Hispaniarum Regnis bono Ecclesiasticæ disciplinæ regimine condidit; quasque etiam ejusdem Successor Benedictus XIII. *in forma specifica* confirmavit, & ut in omnibus locis pro regula ac norma haberentur, in Appendice Concilii Romani à se celebrati voluit insertas; ipsam verò declarationem inter ejusdem Concilii decreta retulit Tit. XV. Cap. III. in quo quidem Concilio Nos quoque ad Sacrorum Canonum Interpretationem adhibiti fuimus. Declarationis verba Nos etiam hic libenter apponimus = *Declaramus, quod, cum in prædicto Decreto* = de Clementis XI. Decreto sermo est =, *statuatur, non licere Episcopis extra domum propriæ habitationis, in domibus Laicis erigere Altare, ibique Sacrosanctum Missæ Sacrificium celebrare, sive celebrari facere; hujusmodi prohibitio intelligenda non sit de domibus, etiam Laicis, in quibus ipsi Episcopi forte, occasione Visitationis, vel itineris, hospitio excipiantur; ut nec etiam quando Episcopi in casibus à jure permissis, vel de speciali Sedis Apostolicæ licentia, absentes à domo propriæ ordinariæ habitationis, moram idcirco faciant in aliena domo per modum similis habitationis; his enim casibus licita ijs erit erectio Altaris ad effectum prædictæ celebrationis, non secus ac in domo propriæ ordinariæ habitationis.*

Optimum factu judicavimus in Encyclica hac Epistola Nostra exponere Vobis hæc quæ ad Fraternitates Vestras præcipue pertinent, nimirum quantum Vobis concessum est quoad Sacella, seu Cappellas, quæ in Episcopalibus Palatiis Vestris sunt; quantum item Vobis in alienis domibus, & extra Vestram Diocesim facere permissum est: Causas etiam concessionum, ac privilegiorum indicavimus, necnon eorundem abusus atque abusuum prohibitiones apposuimus; tum ut Vos discrimen agnoscat, quod intercedit inter Cappellas Episcopalium Ædium Vestrarum, per quas non minus spirituali consolationi, & commodo vestro, quam dignitatis vestræ decori providetur; & privata Oratoria in domibus Laicorum, sive intra, sive extra Diocesim vestram, in quibus aliquando Vobis, pro præcipuo fine hujusmodi commodi, & consolationis vestræ, Privilegio Altaris erigendi, ac celebrandi, vel celebrari faciendi, uti licet; tum verò etiam, ne forte, cum Vos contra abusus privatorum Oratoriorum in domibus Laicorum invigilare debeatis, redargutioni illi obnoxii sitis, quod alienos in aliorum domo



domo defectus dum corrigitis, interim vestræ domi, atque in propria agendi ratione excessus adhibeatis. Ideoque ad privatorum Oratoriorum propositum, qui in Domibus Laicorum sunt, gradum facientes, aliqua præmitteremus.

Primum quidem est, privatorum Oratoriorum in dictis domibus usum ab antiquo tempore repetendum esse; cum constet, Apostolos Sacra Mysteria privatis in domibus celebrasse, eumque morem persecutionum tempore servatum fuisse, quemadmodum Christianus Lupus *in suis notis ad Canones Trullanos* appositè animadvertit. Alterum autem, privata Oratoria in domibus Laicorum, subsequenter etiam seculis fuisse, cum persecutiones jam cessassent; cum in Sacramentario Gallicano, quod Mabillonius *tom. 1. Musæi Italici* impressum edidit, *Collecta* legatur, quæ recitanda erat in Missa, quæ celebrabatur *in domo cujuslibet*: nec ad hujusmodi quidem assumptum aliæ deficiunt probationes, quas Nos in Tractatu nostro *de Sacrificio Missæ sect. 1. §. 10.* cum cura colligere studuimus. Tertium porro est, de tollendis hujusmodi Oratoriis privatis in domibus Laicorum, seu potius facultatibus Missam in ipsis celebrandi, pluries cogitatum esse. Nihil de Justiniani Novella 58. dicemus, in qua, ne in domesticis Oratoriis celebraretur, lege interdixit, tantummodo permittens, ut in eisdem oraretur: nihil præterea de Novellis 4., & 15. Leonis Sapientis, qui prohibitionem sustulit, asserens, adeo tunc privata Oratoria multiplicata fuisse, in quibus Missæ celebrarentur, ut non solum optimates, sed mediocris etiam conditionis homines in suis domibus eadem haberent. Quod verò spectat ad ea monumenta, quæ proxima temporibus nostris sunt, satis erit illa indicasse, quæ in dicto Tractatu *de Sacrificio Missæ loco superius citato* à Nobis allata fuerunt. Quartum, quod licet fere semper in Laicorum domibus privatorum Oratoriorum usus habitus fuerit, in quibus Missa celebrabatur; semper tamen Episcoporum licentia necessaria fuit: Ad quam concedendam ipsi valde faciles plerumque erant: *Missarum solemnities non ubique, sed in locis ab Episcopo consecratis, vel ubi ipse permiserit, celebranda censemus*: Verba sunt *Can. Missarum, de Consecrat. dist. 1.*: Hæc autem facilitas, propter quam interdum factum est, ut Oratoria domestica, licet frustra, prohiberentur, multo magis in usu fuit in Ecclesia Orientali; ob id potissimum,

quod in Ecclesijs Græcorum non nisi unicum Altare erat, & postquam una super ipso Missa celebrata esset, altera per eundem diem celebrari minime poterat. Balsamon in *Commentarijs ad Canones Trullanos* testatur, quod sine ulla alia formula, impertita ab Episcopo celebratur Sacerdoti licentia celebrandi Missam in privatis Laicorum Oratorijs, quoties super Mappis ab Episcopo consecratis celebraret. Postremum autem, quod dicimus, illud est: Quum, post varios Sermones in Sacro Concilio Tridentino hac de re habitos (quod Concilium, tam magna cum Polonici Regni gloria, tanto plausu acceptatum fuit, opera Cardinalis Osii, & Nuntii Commendonii in magno Conventu habito coram Rege Sigismundo Augusto, quemadmodum in ipsius Concilii Historia per Cardinalem Pallavicinum conscripta *lib. 24. cap. 13.* videre est). in *sess. 22.* in Decreto de *observandis, & evitandis in celebratione Missæ* sequenti modo statutum, & ordinatum fuerit = *neve patiantur*, de Episcopis sermo est, *privatis in domibus atque omnino extra Ecclesiam, & ad Divinum tantum cultum dedicata Oratoria, ab iisdem Ordinarijs designanda, & visitanda, Sanctum hoc Sacrificium à Secularibus, aut Regularibus quibuscumque peragi = cum adiecta derogatione cuilibet privilegio, exemptioni, & consuetudini = non obstantibus privilegij exemptionibus, appellationibus, ac consuetudinibus quibuscumque =*; Ex eo factum esse, ut non amplius Episcopis facultas sit concedendi usum Oratoriorum privatorum in domibus Laicorum causa in iisdem Missam celebrandi: Cum licentia, quæ ab ipsis daretur celebrandi Missam in Oratorijs privatis, neutiquam stare possit cum præcepto à Concilio eisdem ipsis imposto, ne id permittere debeant; ac proinde prædictum Jus ad Sanctam Sedem devolutum fuisse, quoniam circumstantiæ temporum, & Oratoriorum privatorum in Laicorum domibus dilatatio minime permittebant, ut eadem prorsus abolerentur. Atque hujusmodi semper fuit Conciliaris Textus intelligentia, quam tradidit Congregatio Concilii, privativa ejusdem interpres; quæque etiam à *sel. record.* Prædecessore nostro Paulo Papa V. in Epistola Encyclica anno 1615. ad omnes Episcopos expedita, approbata fuit: quæ quidem Epistola tum apud varios Auctores, tum etiam in *citato Tractatu Nostro de Sacrificio Missæ sect. 2. §. 42.* impressa reperitur. Et in ea quidem alia quæcumque Verborum Concilij in-

telli-

telligentia reprobatur: multaque de irreverentia erga Missæ Sacrificium dicuntur, cui nimia Episcoporum facilitas in concedenda licentia sine ulla limitatione, aut cautela, non parum fomenti præbebat. Denique in eadem ita concluditur, *facultatem hujusmodi licentias dandi, ipsius Concilij Decreto, unicuique ademptam esse, solique Beatissimo Romano Pontifici esse reservatam.*

Postquam Jus concedendi Oratoria in privatis Laicorum domibus Sedi Apostolicæ reservatum fuit, dici vix potest quantum curæ ac diligentiae adhibitum sit pro recto ejusdem moderamine. Qua de re in Archivo Congregationis Concilij, cujus olim Secretarii munus Nos ipsi, antequam ad majores Dignitates ascenderemus, plures per annos gessimus, authentica documenta reperiuntur. Hæc tandem pro lege statuta fuerunt, quemadmodum ex formulis Litterarum in forma Brevis quæ conceduntur, colligere licet: Oratorium scilicet parietibus, per quos ab omnibus aliis domesticis usibus segregetur, extractum esse debere; idem prius vel ab Episcopo, vel ab alio cui ipse vices suas delegaverit, visitandum esse, inspiciendi gratiâ, num decens, & aptè compositum sit, & num aliquid eorum, quæ necessaria sunt, in eodem desit; ut Episcopus, sit qui celebrandi Missam licentiam imperiatur, & quod licentia hujusmodi secundùm rationale illius arbitrium perduret; nec plures in die, sed unica tantum Missa in Oratorio celebretur; & quod hæc Missa celebretur à Sacerdote vel Seculari vel Regulari, dummodo Secularis ab Episcopo approbatus sit, Regularis autem licentiam habeat à suo Regulari Superiore; Ne Missa celebrari possit diebus solemnibus Paschatis Resurrectionis, Pentecostes, Nativitatis Domini Nostri JESU Christi, & alijs solemnioribus diebus, quos inter etiam enumerantur dies Epiphaniæ, & Ascensionis Domini, Annunciationis, & Assumptionis Beatæ Mariæ Virginis, Omnium Sanctorum, necnon SS. Apostolorum Petri, & Pauli, ac Titularis Ecclesiæ Loci: Exprimuntur personæ, quarum præsentia necessaria est, ut in privato Oratorio Missa celebrari possit; aliæ item, quæ dum supradictis præsentibus Missa celebratur, eidem interesse possunt, & Ecclesiastico præcepto satisfacere: Denique declaratur, omnia sine Parochialium jurium præjudicio fieri debere.

Atque hæc sunt, quæ in consuetis privatorum Oratoriorum Brevibus continentur; quædam vero alia expediri con-

tingit Brevia, quæ extraordinaria sunt; ut quum, exempli gratia, iustis cuiquam de causis concessio fit, ut secundam Missam celebrari facere possit, vel, ut eadem aliquantò citius, aut aliquantò serius eo temporis limite seu termino celebretur, qui in Rubricis præfixus est; vel etiam in diebus exceptis; & alia hujuscemodi. Cum autem interdum tam circa Brevia privatorum Oratoriorum prioris speciei, quum circa alia, ac generatim super omnibus controversiæ exortæ sint; Apostolica Sedes per hujusmodi occasiones opportunis rationibus super hoc providere non prætermisit.

In ordinarijs Brevibus, ut plurimum duobus Conjugibus licentia conceditur faciendi, ut in privato Oratorio Missa celebretur; exprimiturque, ut Missa celebrari possit tum iisdem præsentibus, tum eorum filijs, consanguineis, atque affinibus, qui unà cum ipsis in eadem domo habitationem habent. Numquam exorta difficultas est, an, cum aut Vir, aut Uxor Missæ interfunt, si consanguinei, & affines, qui in eadem domo habitant, præsentés pariter adsint, Ecclesiastico præcepto diebus Fests satisfaciant; id tamquam tutum, ac Brevis Literæ cohærens habitum est: Summa autem difficultatis eò semper rediit, ut dispiceretur, num, cum neuter Conjugum adsit, sed unus ex consanguineis, aut affinibus in eadem domo habitantibus, posset eo jubente in privato Oratorio Missa celebrari; & num alij, qui in domo illa habitant, consanguinei, & affines, eandem audientes Festo die, Ecclesiastico præcepto audiendi Missam satisfaciant. In hoc autem divisiæ, de more, Auctorum opiniones erant; verum cum hujusce difficultatis punctum in Congregatione Concilij die 3. Decembris 1740. in causa, cujus inscriptio erat *Marsicen. Oratorij*, propositum ac discussum esset; decisum fuit, non posse in privato Oratorio Missam celebrari, nisi Indultariorum præsentia ibidem haberetur; quod idem est ac si dicatur Viri, vel Uxoris, ad quos Breve directum erat; quemadmodum in tom. 9. Resolutionum Congregationis Concilij anni 1740. ad pag. 89. & seq. videre est.

Cum autem Decreti hujusce facta Nobis relatio esset, idem per Nos sub die 7. Januarij 1741. confirmatum fuit: Ac præterea demandatum, ut in hujusmodi Brevibus, in quibus certis quibusdam ac determinatis personis concessio fit, ut unam in privato Oratorio Missam celebrari facere possint, quæ Missa pro filijs, consanguineis, & affi-

affinibus valeat; majoris claritatis gratia, subjecta clausula adjungatur: *Volumus autem, quod nati, ac consanguinei, & affines prædicti unicam dictam Missam, vobis quidem præsentibus audire tantummodo, numquam vero celebrari facere audeant.* Ut autem, quæ Indultariæ personæ sint, facile agnosci possent, sine quarum præsentia, Missa celebrari non potest, neque qui eandem audit, præcepto satisfacit; adjunximus, ut pro Indultariis personis illæ haberentur, quæ in Fronte, seu Inscriptione Brevis nominatæ forent, cum ad easdem ipsas Breve dirigatur.

Nos ab hujusmodi norma minime recedimus: verum quia aliqua interdum in corpore Brevis persona nominatur, qua præsentem, conceditur, ut Missa celebrari possit, & quod alii affines, consanguinei, vel familiares eandem audientes, præcepto satisfaciunt, etiam si prædicta persona in Fronte Brevis minime nominetur; hinc est, quod, firmâ semper eâ regulâ manente, ut possit in privato Oratorio Missa celebrari, dum aliqua ex Indultariis personis adsistit, quæ in Fronte, seu Inscriptione Brevis nominantur; dicimus, posse Missam celebrari, etiam si nulla earum personarum præsens adsit, quæ in Fronte, seu Inscriptione Brevis nominantur, dummodo illa præsens sit, cui in Brevis corpore nominatum & expressè facultas tribuitur, ut possit in privato Oratorio tum cum ipsâ adsistat, facere ut Missa celebretur.

Atque ut res exemplo magis pateat: Datur Viro, & Uxori facultas faciendi, ut in privato Oratorio Missa celebretur, atque ad hos Breve dirigatur. Hic autem Vir superstitem habet Matrem; Hæc vero in Fronte, seu Inscriptione Brevis minime nominatur; verum cum in Brevis corpore dicatur, quod ipsa quoque Mater eandem Missam celebrari facere possit & valeat; id sufficiens est, ut solâ Matris præsentia adhibitâ, Missa in Oratorio celebrari possit, etiam si Mater in Fronte seu Inscriptione Brevis nominata non sit. Quæ hæcenus dicta sunt, in hujusmodi generis Brevibus indicantur; verum curæ Nobis erit, ut in posterum feliciter etiam, & sine ulla confusione exprimantur.

In consuetis sive ordinariis Brevibus, solemnes, quemadmodum dictum est, dies excipiuntur, quos inter Natalis Christi Domini dies recensetur, in quo tres à quolibet Sacerdote Missæ celebrantur. Interdum illi, qui privati  
Ora-

Oratorij Breve habet, extraordinarium Breve conceditur, in quo eidem, valetudinis causa, Missam domi audire diebus etiam exceptis permittitur. Cum autem in hujusmodi Brevibus de unica tantum Missa sermo fit; orta difficultas fuit, num possent die Natalitio à Sacerdote, qui in ipso celebrabat, tres Missæ celebrari: De quo cum Nos eo tempore, quo Concilii ejusdem à Secretis eramus, peculiarem Dissertationem conscripsissemus, atque in lucem edidissemus; *sub die 13. Januarij anni 1725.* resolutum à Congregatione fuit, quod à Sacerdote tres Missæ celebrari possent, quemadmodum *tom. 3. Thesauri Resolutionum pag. 109. Et seq., & pag. 116.* videre est.

Reliquum est, ut de Sacris Functionibus dicatur, quæ in ijs Oratorijs fieri possunt, quæ in domibus privatorum sunt, & in quibus non plures, quam unicam tantum Missam celebrari permissum est, nisi cum forte cuipiam ex speciali gratia concessa facultas esset faciendi, ut secunda celebretur. Quod ad Baptismatis Sacramentum attinet, jam in Viennensi Concilio sub Pontifice Clemente V. decretum fuit, ne Baptismus in aliis locis conferri possit, præterquam in Ecclesijs, in quibus Sacri hujus Lavaeri Fontes reperiuntur, nisi cum casus necessitatis adesset, aut cum de Regum vel Principum filijs ageretur, quemadmodum in Clementina unica *de Baptismo, & ejus effectu,* videre est.

Quod autem Sacramentum Pœnitentiæ respicit, jam in Rituali Romano sub Titulo *de Sacramento Pœnitentiæ,* cum de Sacerdote sermo fit, qui Confessiones audit, statutum fuit, *in Ecclesia, non autem in privatis ædibus, Confessiones audiat, nisi ex causa rationabili, quæ cum incidit, studeat tamen id decenti, ac patenti loco præstare.* Rituale hoc à Pontifice Paulo V. confirmatum fuit. Et magnus Ecclesiasticæ disciplinæ Instaurator Sanctus Carolus Borromæus tum in Instructione Sacramenti Pœnitentiæ, tum in Monitis ad Confessarios, atque in primo suo Provinciali Mediolanensi Concilio, id inculcare non prætermisit, quemadmodum in Actis Ecclesiæ Mediolanensis Editionis Civitatis ejusdem *part. 1. pag. 11., part. 4. pag. 520., eadem part. 4. pag. 761., & pag. 773.* videre est: *pag. autem 775.* Superioribus Regularium inculcat, ut id à Subditis eorum exactè adimplendum curent. Cum autem à prædictis Confessarijs Regularibus prolata in medium facultas esset, audiendi ubique  
Con-

Confessiones Fidelium, quam sibi ea ratione ásserebant, quod in Pontificis Clementis X. Bulla — *Superna* — nulla loci limitatio fieret; idem ipse Pontifex declaravit, *nullam facultatem* ( in prædicta Constitutione sua ) *fuisse tributam Regularibus audiendi Confessiones Sacramentales in privatis domibus, ac proinde minimè licere eisdem Regularibus cujuscvis Ordinis &c. Sacramentum Pœnitentiæ administrare in domibus privatis extra casus à Jure permisso:* Quod Decretum cum Præsulis Fagnani subscriptione editum, variis in locis impressum est; ut in Appendice ad Synodum Fulginatensem, quæ à bo: mem: Josaphat Baptistelli Civitatis ejusdem Episcopo anno 1722. celebrata fuit.

Quod pertinet ad Communionem Paschalem, quæ ab unoquoque Catholico Paschatis tempore recipienda est, ex præscripto, tum Decreti Concilii Lateranensis in *Cap. Omnis utriusque sexus, de pœnitentijs, & remissionibus*, tum Concilii Tridentini *sess. 13. cap. 8. can. 10.*, nemo est, qui ignoret, præceptum hoc in propria Parochiali Ecclesia adimplendum esse, aut in alia Ecclesia cum proprii Episcopi, vel Parochi licentia, secundum varias Diœcesum consuetudines. Porro fel. recordat. Prædecessor Noster Paulus Papa IV. Fratribus Minoribus privilegium concessit, ut Sacram Eucharistiam omnibus Christi fidelibus in eorum Ecclesijs distribuere possent, exceptâ tamen die Paschatis Resurrectionis; atque hoc privilegium à sanctæ memoriæ altero Prædecessore Pio Papa V. *per communicationem*, ut dicitur, ad omnes Regulares extensum fuit. Verùm quia, secundum præcedentem Eugenii IV. Constitutionem, Paschale tempus, intra quod Communionis præceptum adimplendum est, à Dominica Palmarum initium habet, ac Dominicâ in Albis terminatur; cum exortum dubium fuisset, num licitum Regularibus foret intra præscriptum eorundem dierum terminum Sacram Eucharistiam Fidelibus in eorum Ecclesijs distribuere; resolutum fuit, die Paschatis nemini distribui posse, ne illis quidem, qui intra Sanctiorem Hebdomadam Paschali præcepto in propria Parochiali Ecclesia satisfecissent: Possent quidem Regulares in aliis Paschalis Temporis diebus Fideles in eorum Ecclesijs Sacram Eucharistiâ reficere; hac tamen conditione, ut Communionem refecti, scirent, non ideo se à præcepto illo exemptos esse, ut Paschalem in propria Parochiali Ecclesia Communionem recipere deberent,

rent. Illustria Congregationis Concilii Decreta sunt, quibusdam in Causis, Senonensi videlicet, Burdegallensi, & Mechliniensi, quæ à Nobis in Nostro *de Synodo Diocesana* Tractatu *lib. 7. cap. 42. num. 3.* relata sunt.

Extra Paschalem vero Communionem, cum in Sacro Tridentino Concilio *sess. 22. cap. 6. de Sacrificio Missæ*, quæ subjicimus, verba legantur = *Optaret quidem Sacrosancta Synodus, ut in singulis Missis Fideles adstantes non solum spirituali affectu, sed Sacramentali etiam Eucharistiæ perceptione communicarent, quoad eos Sanctissimi hujus Sacrificij fructus uberius perveniret* =, non desuit, qui ex iisdem verbis deduceret, quod certè & clarè inde consequantur, ut in privatis Oratoriis, quando in ipsis celebrandi Missam facultas est, distribui Eucharistia possit, iis, qui Missæ præsentibus adsunt; neque ad hoc præsentandum ullo particulari Indulto opus sit. Super hujusmodi quæstionis capite Nos in *nostra Institut. 34. §. 3.* differuimus, inter eas, quas tum cum Bononiæ resideremus Ecclesiæ illius Archiepiscopatum gerentes publicavimus; quas quidem Institutiones cum Italico Sermone edidissimus, postea Romæ Latine redditæ, atque impressæ sunt: Jbi autem expositam paulo ante opinionem retulimus, verum aliam esse subjunximus, quæ Episcopi licentiam requirit, ut qui domesticum Oratorium domi habet, dum Missæ in eodem interest, communicare possit. Hujusmodi opinio tum bono rerum ordini, tum Romanæ etiam consuetudini, sive praxi cohærens Nobis visa est; ac proinde ordinavimus, ne in privato Oratorio recipi Communio posset ab iis, qui in eodem Missæ interfunt, quam vel Secularis Sacerdos, vel Sacerdos Regularis celebraret, nisi vel Nostram, vel Generalis Vicarii Nostri licentiam obtinuisset. Neque etiam in præsens voluntas Nobis, aut ratio est, cur ab hoc Systemate recedamus: Siquidem, cum Nos in magna illa controversia super Communionem illis distribuenda, qui Missæ præsentibus cum sint, eandem petunt, quæ aliquot ab hinc annis in Italia exorta fuit; postquam Tridentini Concilii verba retulissimus, atque eorum zelum commendassimus, qui inter Sanctæ Missæ celebrationem Communionem recipiunt; Ecclesiasticos quoque Pastores excitavissimus, ne Eucharistico cibo illos fraudarent, qui ejusdem famelici forent; cum inquam animadvertissimus, ejusmodi circumstantias dari posse,



posse, in quibus vel temporis, vel loci ratione, Episcoporum prudentia oportunum factu existimet, Sacram Eucharistiam etiam illi, qui Missæ interfuit, minime distribui; eo magis quod, juxta præsentis temporis disciplinam, libera eidem facultas patet, ut eandem alio loco, atque alio tempore recipere possit; ordinavimus, ut in hoc debita proprii Superioris præcepto obedientia præstari deberet; cui qui morem gerere recusasset, nimis manifestum indicium præbisset, quam parum animo dispositus ac paratus esset ad Altaris Sacramentum recipiendum; Quemadmodum in Literis Nostris, quarum initium est = *Certiores effecti*, & quæ in Bullario nostro tom. 1. num. 64. leguntur, videre est.

Atque hæc sunt, Venerabiles Fratres, quæcumque in Encyclica hac Epistola Nostra vobis exponere oportunum existimavimus; à quo quidem satis intelligetis, quod, legendis & considerandis Apostolicis Literis concessionum Oratorii, Decessorum nostrorum Decretis, harum Congregationum resolutionibus, quæ à Nobis etiam in præsentia confirmata sunt: nullus amplius litibus, & controversijs locus reliquus sit. Verum quia Vos illud fortasse Nobis responsuros arbitramur, optimè quidem hæc omnia habere, verum eò difficultatem redire, quod quæcumque decreta, atque ordinata sunt, minime observantur; ne grave vobis sit, hoc per Nos reponi, quod si inobservantia ex neglecta Brevium lectione, & consideratione, aut ex ignoratione Decretorum, & Pontificiarum resolutionum, originem habet; Nos quidem in hoc nunquam culpandi erimus; idque nunc maxime, postquam, ingravescente licet ætate nostra, & multis ac difficillimis curis assidue Nos prementibus, in Encyclicam hanc Epistolam Nostram, quidquid hac super re scire opus erat, inserere non detrectavimus.

Quod si vos etiam id præstare curabitis, ut in Diocesanis Synodis vestris, in vestris itém Edictis, quæ à vobis pro bono Diocesis vestræ regimine publicantur, Pontificiorum Decretorum ac Resolutionum desuper indicatarum observantiam inculcetis; duplex inde bonum extabit, ut, & vivam in vobismetipsis eorundem memoriam teneatis, atque ab aliis, aut ignorantiam expellatis, aut eandem, utpote crassam deinceps atque supinam, inexcusabilem reddatis. Hanc agendi rationem ac normam

mam tenuerunt, atque in præsentia tenent nostri Italix Episcopi, qui aut Pontificiorum Decretorum, quæ super privatis Oratorijs condita sunt, summam, in Synodis suis inferuerunt, aut in Appendice ad ipsas Synodos eadem Decreta *per extensum* adjunxerunt, quemadmodum in Synodo *anno 1724.* à bon. mem. Cardinali de Via Arimini habita, in altera *anno 1726.* celebrata à bon. mem. Cardinali Pignattelli Archiepiscopo Neapolitano, atque etiam in ea, quæ *anno 1736.* habita fuit à Ven. Fratrem nostro Annibale Cardinale Albano, Sabinensi tunc temporis Episcopo, atque in aliis multis videre est.

Non ex eorum numero Nos sumus, quibus persuasum sit, omnia in nostra tempora inconvenientia incidere, atque ea præsentibus diebus contingere scandala, quæ numquam præteritis temporibus evenerint. Satis superque pro certo habemus, ea quæ hodie fiunt, alio tempore accidisse: Ac ne à proposita re longius recedamus, illud dicemus, quod si hodie sacræ leges ad privata Oratoria pertinentes à Sacerdotibus violantur, propter præsidium, quo nituntur, Magnatum Sæculi, apud quos Cappellani munere inserviunt; idem nono etiam Seculo eveniebat, cum S. Agobardus tunc temporis Archiepiscopus Lugdunensis, de eadem re queratur in suo Tractatu *de Privilegio & jure Sacerdotij cap: 11.* Non tamen idcirco vobis Sacerdotalis constantia, atque animus deponendus est. Pia ac Religiosa Polonorum Natio est; & si quando aliquis abusus in privatis ejusdem Oratorijs contingat; cum id Magnati, cujus in domo commissus, aut introductus est, notum fiat, rationes adducendo, & ostendendo, quod per abusus privilegium amittitur; Sperare est, ipsum omne suum inobedienti Cappellano præsidium certo sublaturum: & si quando infortunium accideret, ut hac ratione finis non obtineretur; præsto vobis semper spiritualia arma sunt, quibus contra Cappellanos uti potestis. Fortasse autem si hac ratione factum esset, quum primùm de inconvenienti rescitum fuit; pace omnium dicemus, res non eò progressuras fuisse, in quo nunc statu sunt: sicut ex recursibus ad Nos delatis notum factum est, quorum causâ ad Epistolam nostram conscribendam animum adduximus.

At enim inconvenientia à Privilegiatis, & Exemptis proficisci

cisci vos fortasse dicturos prævidemus, nimirum à Regularibus, de quibus in prædicto recurſu ad hanc Sanctam Sedem facta plura inſinuantur. Nos autem id vobis dicimus, nulla privilegia, nec exemptiones eſſe, quæ impedire poſſint, quominus abusus exterminentur.

Habebant ſine dubio Regulares privilegium Altaris viatici, & ut ſuper eodem Altari Miſſam, ubicumque locorum forent, ſine ulla Episcoporum licentia, celebrare poſſent, quemadmodum in Decretali Honorii III. *in Cap. In his, de privilegijs* videre eſt: à quo deinde privilegio ſtabat, ut Miſſam poſſent celebrare etiam in domibus laicorum, ſive ſuper Altari viatico, ſive ſuper Altari fixo, etiamſi laicus privilegium Oratorii privati minime haberet; propter eam rationem, quod privilegium celebrantis ſuum vigorem haberet, licet celebrationis locus minime privilegiatus foret. Verùm cum Sacrum Tridentinum Concilium in citata *ſeſſ. 22.* in Decreto jam citato *de observandis, & evitandis in celebratione Miſſæ*, Episcopis præcepiſſet, ne permittant, ut in privatorum domibus Miſſæ celebrentur à *Secularibus aut Regularibus quibuscumque*, eiſdemque dediſſet facultatem procedendi, tamquam Apoſtolicæ Sedis Delegatos, contra refractarios = *Vt Delegati Sedis Apoſtolicæ*, atque omnibus privilegijs, exemptionibus, & conſuetudinibus contrariis, cujuſcumque generis eſſent, derogariſſet = *Non obſtantibus privilegijs, exemptionibus, appellationibus, ac conſuetudinibus quibuscumque*; Hinc neceſſariò conſequitur, Sacrum Concilium Tridentinum tam præcedentibus Altaris viatici privilegijs derogariſſe, quàm facultati Miſſam in privatorum domibus, ſine Episcopi licentia, celebrandi; atque ulterius Episcopum, tamquam Sedis Apoſtolicæ Delegatum, contra inobedientes procedere poſſe, etiamſi exempti ſint; nullum verò amplius eſſe privilegium vel exemptionem, quæ obſtet, quæque impediatur, quominus abusus tollantur. Nihil autem valet ea, quæ à quibusdam promovetur, aſſertio, videlicet, Concilium privilegio, de quo agitur, minime derogariſſe; eo quod illud *in corpore Juris* incluſum ſit; etenim Sacrum Concilium Tridentinum iis etiam derogare privilegijs conſuevit, quæ *in corpore Juris* incluſa ſunt, nullam etiã de iis expreſſam mentionem faciendo, ſed ſimpliciter aliquid contrarium ipſis determinando, generali adjectâ ad contraria privilegia derogatione, quemadmodum

admodum celebris Præsul Fagnanus in cap. Nonnulli  
num. 42., & seq. sub tit. de Rescriptis ample demon-  
strat.

Quod si forte quis hoc unquam objiceret, concessum sæpè  
ab Apostolica Sede fuisse, atque etiam nunc, post Tri-  
dentinum Concilium, Altaris viatici usum concedi; Fra-  
ternitatibus Vestris notum esse debet, hujusmodi privi-  
legium in iis locis concedi, ubi Ecclesiæ non sunt, aut  
si sunt, talis Hæreticorum potentia est, ut in eisdem  
Catholici non sine gravi periculo ad audiendam Missam  
convenire possint. Uno verbo præcisè necessitati provi-  
detur; quod quidem, ut optime perspicitis, ab eo, de quo  
agimus, casu, plane diversum est.

Gregorii XIII. Decessoris Nostri privilegium legite, quod  
anno 1580. Fratribus Ordinis Prædicatorum Provinciæ  
Poloniæ concessit, quod Bullarii Religiosæ illius Fami-  
liæ tom. 7. pag. 192. insertum est = *In quibusdam Civi-  
tatibus, Oppidis, & locis Provinciæ Poloniæ tanta hære-  
ticorum potentia, & impietas existit, ut Catholicos impu-  
ne opprimant, nec iisdem Catholicis Missas in Ecclesijs,  
quarum raritas in illis partibus existit, audire tuto liceat.  
Nos supplicationibus tuis in hac parte inclinati, tibi, ac  
pro tempore existenti Ordinis Fratrum Prædicatorum Pro-  
vinciæ Poloniæ Priori Provinciali, ut licentiam, & fa-  
cultatem dictis Professõribus Altaria portatilia habendi cum  
debitis reverentia, & honore super quibus in domibus Nobili-  
um Civium, & Incolarum Civitatum, Oppidorum & locorum  
dictæ Provinciæ, in quibus vel Ecclesiæ desunt, vel tanta  
est hæreticorum potentia, & impietas, ut impune oppri-  
mant, in locis ad hoc congruentibus, & honestis, per se  
ipsos Missas in præsentia Personarum Catholicarum celebra-  
re possint, in casibus necessitatis tantum, ita quod eis ad  
culpam nequeat imputari, concedere valeatis, Apostolica  
Auctoritate tenore præsentium de speciali gratia indulge-  
mus.*

Legite item jam superius citatum Clementis XI. Decretum,  
quod, majoris etiam commoditatis vestræ gratiâ, hic  
annexum Vobis transmittimus; etiam si, tum cum illud  
conditum fuit, præter publicationem ejusdem Romæ fa-  
ctam, ad Ordinarios per loca, tam intra, quam extra  
Italiam, transmissum fuisse sciamus. Ab ipso autem  
absque eo quod Nostri rationibus, & animadversioni-  
bus

bus Nos idem roborandum suspiciamus, (quod quidem facere Nobis in proclivi esset; cum præstantiorum, inter Pontificii Juris peritos, Auctorum assertiones ubique in promptu sint;) manifeste cognoscere poteritis, subsistant nec ne amplius portatilis Altaris privilegia, quæ Regularibus concessa fuerunt, & num à Tridentino Concilio eisdem fuerit derogatum: Cognoscetis, num permissum Regularibus sit, secundam in privato Oratorio cuiquam concesso Missam celebrare, cum prima jam celebrata est, nec pro secunda hujusmodi Missa peculiare Indultum adest: Cognoscetis, num in prædictis privatis Oratoriis licitum eisdem sit, vel ante Aurorám, vel post Meridiem, Missam celebrare; num celebrare eandem possint diebus iis, qui in Indulto excipiuntur: Cognoscetis demum, num, exemptione non obstante, contra delinquentes procedendi potestas Vobis sit. Licet autem nulla omnino hujusce rei necessitas sit, illud Nos in præsentia Decretum confirmamus, ac Fraternitatum Vestrarum curæ committimus, ut pro exacta ejusdem observantia invigiletis: cum minime commendatione dignum sit ad Sedem Apostolicam recurrere, inconvenientia exponendo, nisi prius adhibita cum vigore ea remedia sint, quæ ab ipsa Apostolica Sede contra hujusmodi inconvenientia subministrata fuerunt.

In eo, qui ad Nos factus est, recursu, alterius etiam inconvenientis mentio fit, quod scilicet, sine licentia Vestra, Regulares exorcizent; de hoc tamen nihil dicitur, utrum per Vos, aut in Synodis Vestris, aut in Vestris Edictis decretum fuerit. ne ullus Sacerdos vel Secularis, vel Regularis exorcizare audeat, sive in sua sive in aliena Ecclesia, sive intra, sive extra Cœnobium, quin prius à Vobis approbatus sit, atque ita quin ante licentiam à Vobis obtinuerit. Hoc illud est, quod præstari debet, quodque ab Episcopis præstari solet, quemadmodum apud Clericatum *de Sacramento Ordinis decis. 19. num. 42.* ubi Episcopales Synodos affert, videre licet. Quod si nihilominus, post quam à Vobis, tam in hac materia, quàm in alia Oratoriorum privatorum, quantum in Vobis est, præstitum fuerit, Vestra nihilominus præcepta violabuntur, ac pœnæ à Vobis impositæ & inflictæ negligentur; nequaquam certè Nos Officio Nostro deerimus, ut totam Auctoritatem Nostram in favorem Vestrum interponamus; cum nihil antiquius No-

bis

( 22 )

bis sit , quàm ut Episcoporum , qui Fratres Nostri sunt ,  
jura facta tecta servantur. Interim tam Fraternitatibus  
Vestris , quàm Populis curæ Vestræ commissis Apostoli-  
cam Benedictionem peramanter impertimur. Datum ex  
Arce Gandulphi die 2. Junii 1751. Pontificatus Nostri  
Anno Undecimo.

DECRE.

# DECRETUM

FELICIS RECORDATIONIS

CLEMENTIS PAPÆ XI.

*Circa celebrationem in Oratorijs privatis,  
emanatum 15, Decembris 1703.*

**N**onnulli Episcopi, & complures Regulares, sub prætextu privilegiorum, ea sibi licere putant, quæ prohibita sunt; siquidem Episcopi etiam in aliena Diœcesi, extra domum propriæ habitationis, in privatis Laicorum domibus erigi faciunt Altare, ibique per unum, aut plures è suis Cappellanis vivificam Christi Hostiam immolari, Regulares verò in quibusdam Magnatum seu aliarum Nobilium personarum privatis Oratorijs, quæ certis quandoque ex causis à Sede Apostolica concedi solent, celebrare audent, vel plures Missas, quàm in ijs sit indultum, vel absque præsentia personarum, quatum contemplatione gratiosa concessio emanavit, vel extra debitas horas, & post meridiem, vel illis etiam diebus, quibus per Constitutiones Diœcesanas, aut etiam Decreta Sacræ Congregationis Concilij, celebrari prohibentur, aut quæ in ipsis Indultis Apostolicis excipiuntur, quo minus in illis celebrari possint; aut etiam Altari portatili uti non verentur, in Sacrarum Sanctionum contemptum, ac Sancti Sacrificij irreverentiam. Quamobrem ad abusum hujusmodi eliminandos, & ad instaurandam venerationem tremendo Mystero debitam; Sanctissimus Dominus Noster ex unanimi Voto S.R.E. Cardinalium Concilij Tridentini Interpretum, inhærendo declarationibus aliàs hac de re editis, expressè declarat: Episcopis, & his majoribus Prælatibus, etiam Cardinalatus Dignitate fulgentibus, neque sub prætextu privilegij clausi in corpore Juris, neque alio quoquo titulo, nullo modo licere extra domum propriæ habitationis, in domibus Laicis, etiam in propria Diœcesi, quod fortius intelligitur in aliena, etiamsi Diœcesani consensus adhiberetur, erigere Altare, ibique  
Sacro.

Sacrosanctum Missæ Sacrificium celebrare, sive celebrari facere: Ac pari modo in Oratorijs privatis, quæ per Sanctam Sedem concessa fuerint, non licere Regularibus cujuscvis Ordinis, aut Instituti, seu Congregationis, etiam Societatis JESU, aut etiam cujuscumque Ordinis Militaris, etiam S. Joannis Hierosolymitani, aut alijs quibuscumque Sacerdotibus, etiam si essent Episcopi, in ijs celebrare in diebus Paschatis, Pentecostes, Nativitatis Christi Domini, alijsque anni Festis solemnioribus, ac diebus in Indulto exceptis: In reliquis vero diebus, prædictis Regularibus, & Sacerdotibus quibuscumque, etiam Episcopis, in præfatis Oratorijs celebrare non licere, ubi jam unica Missa, quæ in Indulto conceditur, fuerit celebrata; super quo celebraturus teneatur diligenter inquirere, & de eo se optime informare; atque illa etiam in casibus præmissis celebrari nequeat post meridiem; Demandando ulterius, & declarando in omnibus casibus, personas quascumque dictas Missas audientes, nullatenus præcepto Ecclesiæ satisfacere. Quo vero ad Altare portatile, iterum inhærendo declarationibus supradictis, censuit, licentias, seu privilegia, concessa nonnullis Regularibus *in Cap. In his, de priv.* ac per aliquos Summos Pontifices alijs Regularibus communicata, utendi dicto Altari portatili, in eoque celebrandi, absque Ordinariorum licentia, in locis, in quibus degunt, omnino revocata esse per idem Concilium Tridentinum, atque idcirco eosdem Regulares prohibendos, ne illis utantur, ac mandandum, prout præsentis tenore mandat Episcopis, alijsque Ordinarijs locorum, ut contra quoscumque contravenientes, quamvis Regulares, procedant, etiam tamquam Sedis Apostolicæ Delegati, ad pœnas præscriptas per idem Sacrum Concilium in dicto Decreto *sess. 22. cap. unico*, usque ad Censuras latæ Sententiæ; tributa etiam iisdem facultate per hoc Decretum, ita procedendi, perinde ac si per Sanctam Sedem specialiter concessa fuisset: Et ita Sanctitas Sua declarat, & servari mandat &c.

